

太上召諸神龍安鎮墳墓經

太上道君於開光太初之先 與諸天神仙聖眾
同詣長桑林下暘谷之墟 同心作禮 上白
元始天尊 臣切見 凡人父母眷屬亡歿之後
葬在山崗 建墳立塚 以安萬年 冀保宜
孫利子 待其富貴光門 今乃居家撼軻
竟歲凶衰 錢穀耗散 非橫連綿 畜養不
孳 田蠶不旺 臣等仰賴宿因 今身獲慶
伏遇

無上至尊 釋我愚懷 乞垂哀憫 儻蒙宣示
斯乃朽骨重肥 仰受玄恩 難躋生育

元始天尊乃告

太上道君曰 卿今所說凶殃之理 深可哀憫
欲蘇沉迷 咸居福岸 卿當復坐 諦聽訣
言

天尊曰 世人今身貧困之者 是先世不信道
法 不種善因 今世葬埋 不得亡人利益
年月 營葬之所 亦有四時驚犯天星地宿
致見如斯 今得卿之所奏 吾甚欣然 自
今以後 世人若有墳墓不安 災衰競至者

可尋高上道士 如靈寶典式 廣建道場懺
悔罪愆 呼召龍王 來安墳墓 則災患冰
消 福祥雲集

太上道君及諸眾聖 俱起作禮 各願受持
於是

天尊宣召諸大龍王 各施救護 東方青帝龍
王 南方赤帝龍王 西方白帝龍王 北方
黑帝龍王 中央黃帝龍王 修吉神龍王
深林神龍王 多善神龍王 花流神龍王 甘
思神龍王 善然神龍王 波流神龍王 思

慶神龍王 驪龍神龍王 來龍神龍王 應
龍神龍王 諫龍神龍王 三十八山神龍王
二十四向神龍王 天星八卦神龍王

天尊曰 諸大龍王 各有萬眾 有災之日
燒香普召 其龍來降 隨意所願 而重宣
言曰 歲德除青怪 熒惑化災災 太白招
七寶 辰門揖秀回 中尊鎮五墓 諸惡悉
皆摧 神龍奠八表 萬福蓊然來 道言

天尊所告 真經龍王名號 若有善男子善女
人 葬埋墳墓 有犯天星地禁 一切龍神

皆當延至 正一道士 轉誦此經 拜諸神
龍 來安墳墓 自然門戶光輝 子孫繁衍
此經神驗 不可稱量 若生不信 毀謗真
文 禍延億世 是時 大眾聞說此經 皆
稱不可思議 作禮面退 稽首奉行

太上召諸神龍安鎮墳墓經竟